



Vogošća, ul. Jošanička br. 80, tel: 00387 33 586 412, 586-407

Broj: 12-04-sl./26

Vogošća, 01.04.2026. godine

VIJEĆNIČKA PITANJA
POSTAVLJENA NA 16. REDOVNOJ SJEDNICI OPĆINSKOG VIJEĆA VOGOŠĆA
održanoj 31.03.2026. godine

Na 16. redovnoj sjednici Općinskog vijeća vijećnik **Turković Faruk (u ime Kluba vijećnika SDA)** postavio je slijedeća vijećnička pitanja:

- 16/1.** Kao odgovoran pojedinac i vijećnik koji je položio zakletvu da će raditi u skladu sa zakonima Bosne i Hercegovine, te imajući u vidu činjenicu da sam predlagač inicijative za donošenje Odluke o visini komunalnih taksi, imam potrebu da, kada je u pitanju ova tema, prije svega zahvalim pomoćnici načelnika gospođi Fazlić na pripremi kvalitetnog prijedloga Odluke o komunalnim taksama. Međutim, imajući u vidu da je ova tačka danas povučena sa dnevnog reda s ciljem njenog dodatnog unapređenja i korekcije, želim dati svoj doprinos u olakšavanju rada nadležnoj Službi, kako bi se došlo do beskompromisno zakonitih rješenja. S tim ciljem upućujem pitanje prema Vladi Kantona Sarajevo, Ministarstvu finansija Kantona Sarajevo i Ministarstvu pravde Kantona Sarajevo: Da li su navedeni organi upoznati sa presudama Ustavnog suda Federacije Bosne i Hercegovine koje se odnose na oblast komunalnih taksi, te da li su i u kojem obimu, poduzete aktivnosti na izmjenama i dopunama Zakona o komunalnim taksama Kantona Sarajevo. Ukoliko jesu, molim da se precizira:
- u kojoj fazi se trenutno nalaze navedene aktivnosti,
 - koji su planirani rokovi za usklađivanje zakonskih odredbi sa pravnim stavovima Ustavnog suda Federacije BiH,
 - te kada se može očekivati upućivanje nacrtu, odnosno prijedloga izmjena zakona u proceduru.

Također, na koji način navedeni organi planiraju obezbijediti pravnu sigurnost i ujednačenu primjenu propisa od strane jedinica lokalne samouprave, imajući u vidu postojeću neujednačenu praksu u postupanju općina po važećem zakonu?

Vijećnik **Efendić Emir (u ime Kluba vijećnika S BiH)** postavio je slijedeća vijećnička pitanja:

- 16/2.** Postavljam pitanje nadležnoj Policijskoj upravi Vogošća, da odgovore šta su policijski službenici konkretno poduzeli na sprječavanju i rješavanju jako izraženog problema ispisivanja grafita na fasadama stambenih zgrada na području općine Vogošća. Naime, evidentno je da je veliki broj stambenih zgrada odnosno njihove fasade ispisan grafitima različitog sadržaja. Ispisivanje grafita predstavlja kršenje Krivičnog zakona Federacije Bosne i Hercegovine član 293., oštećenje tuđe stvari, za što je propisana novčana i zatvorska sankcija. Obzirom da je ispisivanjem grafita oštećena tuđa imovina od strane NN lica koja su ispisivali grafite u obliku ljubavnih poruka, huliganstva, izražavanja nasilja i drugog sadržaja, potrebno je da nadležni odgovore koje mjere i radnje su konkretno poduzeli na sprječavanju i rasvjetljavanju navedenog oblika kriminaliteta i koliko je lica procesuirano zbog takvog kriminogenog ponašanja.

- 16/3.** Postavljam pitanje nadležnoj službi, kada će biti popravljena asfaltna podloga u raskrsnici ulica Igmanska - Akifa ef. Biserovića kroz koju prolazi željeznička pruga. Naime, na navedenoj raskrsnici već duži vremenski period šine pruge nisu u nivou sa asfaltnom podlogom zbog čega dolazi do usporavanja saobraćaja prilikom prolaska vozila kroz navedenu raskrsnicu. Predmetna raskrsnica je regulisana svjetlosnom saobraćajnom signalizacijom. Međutim, zbog usporenog prelaska vozila preko šina koje nisu u nivou, dolazi do stvaranja kolone vozila naročito u jutarnjim i popodnevnim satima kojom prilikom mali broj vozača iskoristi

svjetlosni interval. Navedeno bi bilo potrebno što prije sanirati, čime bi se odvijanje saobraćaja kroz navedenu raskrnicu u većoj mjeri normalizovalo.

Vijećnica **Džano Emina (u ime Kluba samostalnih vijećnika Bogilović-Džano)** postavila je slijedeća vijećnička pitanja:

16/4. Građani naselja Hotonj su mi se po ko zna koji put, obratili sa molbom da u njihovo ime postavim pitanje vezano za prvo autobusko stajalište u naselju Hotonj iz pravca grada. Obzirom da su neke ulice poprilično udaljenje od drugog stajališta u Hotonju, da li postoji alternativa, odnosno nova lokacija koja bi mogla poslužiti kao privremeno rješenje. Rješavanje ovog pitanja bi se moralo zaista smatrati jednim od prioriteta obzirom i na broj pasa lualica kojih je iz dana u dan na ulicama Vogošće sve više. O tome sam prije nekoliko mjeseci pričala za ovom govornicom, nekoliko kolegica i kolega su spominjali na prosjoj sjednici, ali izgleda uzalud.

16/5. Na samom početku ovog mandata, a na zahtjev mještana naselja Hotonj i Kobilja Glava, pokrenula sam inicijativu za iscrtavanje nekoliko pješačkih prelaza u blizini OŠ "Izet Šabić" i OŠ "Zajko Delić". Inicijativa je realizovana, ali su pješački prelazi skroz slabo vidljivi, pa vas molim da mi odgovorite kada je planirano ponovno obilježavanje/iscrtavanje.

Vijećnica **Curić Samira (u ime Kluba vijećnika SDP)** postavila je slijedeće vijećničko pitanje:

16/6. Postavljam pitanje nadležnoj općinskoj službi za prostorno uređenje i komunalne poslove. Naime, prema informacijama s terena, Osnovna škola „Zajko Delić“ trenutno nema adekvatno riješeno pitanje parking prostora za potrebe uposlenika škole. Nedostatak parking mjesta stvara svakodnevne poteškoće, kako za nastavno i administrativno osoblje, tako i za nesmetano funkcionisanje same ustanove. Također, prema dostupnim saznanjima, u neposrednoj blizini škole postoji općinsko zemljište koje bi potencijalno moglo biti iskorišteno za izgradnju parking prostora. S tim u vezi, postavljam sljedeće pitanje:

- Da li je nadležna općinska služba upoznata sa problemom nedostatka parking prostora kod Osnovne škole "Zajko Delić", te da li su razmatrane mogućnosti da se na raspoloživom općinskom zemljištu u neposrednoj blizini škole izgradi parking za potrebe uposlenika.
- Ukoliko nisu, da li postoji spremnost da se pokrene procedura analize i eventualne realizacije ovog projekta, u cilju poboljšanja uslova rada i sigurnosti saobraćaja u zoni škole.

Vijećnik **Škoro Hamdija (u ime Kluba vijećnika Naprijed BiH)** postavio je slijedeće vijećničko pitanje:

16/7. Obzirom da sam na 14. i 15. redovnoj sjednici Općinskog vijeća, postavljao vijećnička pitanja za konkretan slučaj A.Đ., a da je izostao odgovor postavljen na 15. sjednici, pitam ponovo slijedeće:

1. Zašto nije dostavljen odgovor od strane Centra za socijalni rad i ko snosi odgovornost za za ovakav odnos prvenstveno prema građanima, Općinskom vijeću i meni kao izabranom predstavniku građana.
2. Zahtjevam od Općinskog vijeća i nadležne općinske Službe za boračko-invalidsku zaštitu da kompletira ovaj predmet i o ovome obavijesti: JU Kantonalnog nivoa, Kantonalnu skupštinu, Ministarstvo za rad socijalnu politiku i raseljena lica u Kantonu Sarajevo. Ovo smatram izuzetno HITNIM, budući da osoba o kojoj je riječ i dalje boravi na terenu bez ičega i živi u totalno nehumanim uslovima, a zadužene institucije odnose se na način naveden u pitanju jedan.

Vijećnik **Handžić Jasmin (u ime Kluba vijećnika SDA)** postavio je slijedeća vijećnička pitanja:

16/8. Koliko sam upoznat prema informacijama sa terena, navodno su obustavljeni radovi na realizaciji projekta vodosnadbjevanja naselja Krivoglavci i Poturovići iz razloga da postoje problemi imovinsko-pravnih odnosa. Moje pitanje glasi: da li su navedeni problemi riješeni, odnosno da li su radovi na realizaciji projekta vodosnadbjevanja naselja Krivoglavci i Poturovići nastavljeni, ukoliko nisu kada možemo očekivati da isti budu nastavljeni.

16/9. Pitanje upućujem nadležnoj općinskoj službi, koje se odnosi na organizaciju školskog prevoza učenika sa područje općine Vogošća. Prema saznanjima organizovani školski prevoz nije usaglašen sa rasporedom časova, posebno u prvoj smjeni u kojoj su veći razredi. Prema rasporedu vožnje u jutarnjoj smjeni prevoz je organizovan nakon šestog časa koji završava u 13,15 sati. Za učenike koji imaju sedmi čas, a koji koriste školski prevoz nema organizovan prevoz i isti moraju pješaćiti do kuće. Također ukoliko se desi da učenici nemaju prvi čas, isti nemaju prevoz do škole, jer je prevoz organizovan sa određene lokacije sa polaskom u 7,30 i nakon toga tek u 13,00 sati za drugu smjenu sa određenim brojem povrataka iz škole. Ovakvim rasporedom školskog prevoza, učenici su ograničeni da pohađaju određene sekcije, kao i dodatnu nastavu iz razloga jer se te aktivnosti održavaju za vrijeme sedmih časova. Molim da mi se dostavi informacija iz kojih razloga nije obezbjeđen dodatni školski prevoz nakon šestih časova, odnosno zašto isti nije usaglašen sa rasporedom časova učenika. Da li postoji plan ili mogućnost usklađivanja reda vožnje, kako bi se učenicima omogućio redovan i siguran dolazak i povratak iz škole.

Vijećnik **Hebib Armin (u ime Kluba vijećnika SDP)** postavio je slijedeća vijećnička pitanja:

16/10. Kada će biti izrađen i usvojen pravilnik kojim će se definisati mjere ekonomske podrške ženama starijim od 35 godina, te kada se može očekivati da njegova konačna verzija bude upućena Općinskom vijeću na razmatranje.

Obrazloženje:

Prilikom usvajanja Budžeta Općine Vogošća za 2026. godinu, kroz javnu raspravu uputili smo prijedlog mjere ekonomske podrške ženama starijim od 35 godina, koji je prihvaćen. Ukazano je na izraženu potrebu za ciljanim mjerama podrške ovoj kategoriji, imajući u vidu otežan pristup tržištu rada i ograničene mogućnosti samozapošljavanja. Prema dostupnim podacima, čak 67% nezaposlenih na području Općine Vogošća čine žene, što ukazuje na postojanje značajne strukturalne neravnopravnosti. Također, kroz Gender akcioni plan (GAP), Općina se obavezala da kreira politike zasnovane na relevantnim pokazateljima i stvarnim potrebama, uključujući mjere za smanjenje rodni razlika u zapošljavanju. U okviru prihvaćenih izmjena budžeta predviđeno je da se kroz postojeći grant program „Sufinansiranje poslovnih planova za razvoj poduzetništva i zapošljavanje mladih“ izvrši prilagođavanje kriterija, bez formiranja nove budžetske stavke, te da se posebnim pravilnikom:

- dodatno budu poslovne ideje žena starijih od 35 godina,
- omogućiti njihova prednost u odnosu na druge aplikante,
- osigura podrška kroz obuke, savjetovanje i mentorski rad.

S obzirom na značaj ove inicijative i činjenicu da njena realizacija zavisi od donošenja pravilnika, smatramo važnim da se javnost i Općinsko vijeće pravovremeno informišu o dinamici njegove izrade i usvajanja.

16/11. Da li je planirano da se i ove godine dodijele zahvalnice i simbolični pokloni nastavnicima za njihov doprinos, ili će, kao i prethodnih godina, priznanja biti dodijeljena isključivo učenicima.

Obrazloženje:

U proteklom periodu održana su, a dijelom se još uvijek održavaju, općinska takmičenja učenika osnovnih škola iz gotovo svih nastavnih predmeta, kao i sportska takmičenja, revije kulturno-umjetničkog stvaralaštva, takmičenja iz Prve pomoći, CIVITAS-a i drugih oblasti. Učenici s područja općine Vogošća postižu zapažene rezultate, kako na općinskom, tako i na kantonalnom nivou, na što smo posebno ponosni. Međutim, važno je istaći da iza tih uspjeha stoje predan rad, trud i zalaganje nastavnika, koji svojim angažmanom značajno doprinose postignućima učenika. S tim u vezi, postavljam sljedeće pitanje: Da li je planirano da se i ove godine dodijele zahvalnice i simbolični pokloni nastavnicima za njihov doprinos, ili će, kao i prethodnih godina, priznanja biti dodijeljena isključivo učenicima. Smatram da je ovakav vid priznanja od izuzetnog značaja, jer predstavlja simboličnu, ali važnu potvrdu vrijednosti znanja, rada i posvećenosti prosvjetnih radnika, te ujedno djeluje motivirajuće za dalji kvalitetan rad i postizanje još boljih rezultata.

Vijećnik **Omerović Denis (u ime Kluba vijećnika SDP)** postavio je slijedeća vijećnička pitanja:

16/12. Da li Općina Vogošća planira u narednom periodu održavati Zborove građana u mjesnim zajednicama po pitanju Nacrta Zakona o legalizaciji, a kako bi se građani što bolje upoznali

o predloženom Zakonu i rješavanju njihovih problema. S obzirom na to da je Zakon već u proceduri, bio bih zahvalan ukoliko bih odgovor mogao dobiti odmah.

- 16/13.** Da li Općina Vogošća ima popis svih lokalnih puteva koji su u nadležnosti Općine, kako onih iz Programa prioriteta, tako i onih koji nisu u Programu, a za koje je potrebna sanacija i izgradnja. Ako da, molim za kompletan popis, uz procjenu okvirnih troškova za svaku aktivnost pojedinačno.

Vijećnik **Mehić Almedin (u ime Kluba vijećnika SDA)** postavio je slijedeća vijećnička pitanja:

- 16/14.** Postavljam pitanje prema nadležnom upravitelju Direkciji za ceste Federacije BiH i Sarajevoputevi DD, da li postoji mogućnost čišćenje propusta i kanala kod Umax pumpe.

Obrazloženje:

Na ovom dijelu puta svakodnevno prolazi preko 20 hiljada vozila svih kategorija. Ako bi se desilo da se kanali, odnosno propusti začepi, može doći do velike katastrofe, a time i ugroziti ljudski životi. Pozivam nadležne, koji su navedeni u formi pitanja, da izvrše čišćenje i uređenje u cilju povećanja protoka i zaštite od izlivanja i poplava na magistralnom putu kojima svjedočimo nakon svakih obilnijih padavina.

- 16/15.** Postavljam pitanje prema nadležnoj službi Općine Vogošća, da li postoji mogućnost da se ofarbaju, odnosno poprave sprave u adrenalina parku koji se nalazi ispred Sportske dvorane „Amel Bečković“.

Obrazloženje:

Adrenalin park je mjesto gdje vogošćani svakodnevno koriste i vježbaju na navedenim spravama, te je došlo vrijeme da se neke zamjene, neke poprave, a neke i ofarbaju. Mislim da nije neka investicija, a ipak je itekako koristan prostor.

Vijećnik **Pašagić Almir (u ime Kluba vijećnika SDP)** postavio je slijedeća vijećnička pitanja:

- 16/16.** Kantonalno javno komunalno preduzeće „Toplane – Sarajevo“ d.o.o. trenutno radi na prikupljanju dozvola za izgradnju termoenergetskog postrojenja – kotlovnice s priključnim vrelovodom u općini Vogošća. Vrijednost projekta iznosi 11 miliona KM, koji će se finansirati iz Budžeta Kantona Sarajevo, a cilj njegove realizacije je trajno rješavanje problema grijanja na području općine Vogošća. Izgradnjom nove kotlovnice osigurat će se stabilno, pouzdano i kvalitetno snabdijevanje toplotnom energijom za više od 600 domaćinstava, koja trenutno opslužuje preduzeće „BAGS Energotehnika“ d.o.o. Realizacijom ovog projekta, kantonalno Ministarstvo nastavlja aktivnosti na modernizaciji i proširenju sistema daljinskog grijanja, čime se značajno doprinosi unapređenju komunalne infrastrukture, povećanju energetske efikasnosti i zaštiti okoliša na području Kantona Sarajevo. U ime građana Vogošće, postavljamo vijećničko pitanje da li je izgradnjom ove kotlovnice planirano da se priključe i nova domaćinstava i koliki je kapacitet pomenute kotlovnice.

- 16/17.** Da li nadležna služba/agencija u Kantonu Sarajevo za zbrinjavanje pasa lualica, na području općine Vogošća planira poduzeti konkretne i hitne mjere na terenu, ili se čeka da dođe do teškog ili tragičnog slučaja kako bi se reagovalo. S obzirom na sve veći broj pasa lualica, formiranje čopora i izražen strah građana, posebno djece i starijih, tražim precizan odgovor:

- koliko je intervencija izvršeno u posljednjih 6 mjeseci,
- koliko prijava građana je zaprimljeno,
- koji su konkretni rokovi za trajno rješavanje ovog problema.

Također, ko snosi odgovornost za očigledno kašnjenje u reakciji i neefikasnu koordinaciju između nadležnih službi. Posebno naglašavam da su djeca koja svakodnevno idu u školu među najugroženijim kategorijama građana. Roditelji su s pravom zabrinuti zbog sve češće pojave čopora pasa u blizini škola, pješačkih ruta i naselja.

Vijećnica **Briga Sanela (u ime Kluba vijećnika SDA)** postavila je slijedeće vijećničko pitanje:

- 16/18.** Postavljam pitanje nadležnoj općinskoj službi: da li je planirano ponovno postavljanje posuda za odlaganje otpada na izletištu u Gornjoj Jošanici. Prema informacijama sa terena, u okviru ranijih aktivnosti na uređenju ovog lokaliteta uklonjene su postojeće posude za otpad, koje nakon toga nisu vraćene, niti su postavljene nove. Trenutno posjetioci i izletnici

koji borave na ovom području nemaju mogućnost adekvatnog odlaganja otpada, što može dovesti do narušavanja higijenskih uslova i degradacije prostora. Molim da se dostavi zvanična informacija o tome da li je planirano ponovno postavljanje posuda za otpad, te ukoliko jeste, u kojem roku se može očekivati realizacija navedene aktivnosti.

Vijećnik **Gljiva Bego (u ime Kluba vijećnika S BiH)** postavio je slijedeće vijećničko pitanje:

16/19. Postavljam pitanje prema nadležnoj općinskoj službi u vezi sanacije i zamjene drvenih podloga na klupama za sjedenje na Trg žrtava Srebrenice. Obzirom da smo u prethodnom periodu već imali inicijativa koje se odnose na sanaciju i zamjenu drvenih podloga na klupama za sjedenje na Trgu žrtava Srebrenice u Vogošći, molim nadležnu službu da dostavi informaciju: da li je po navedenim inicijativama pokrenuto postupanje, te u kojoj fazi se trenutno nalazi realizacija zamjene dotrajalih drvenih podloga. Naime, stanje na terenu ukazuje da su postojeće drvene podloge na klupama u izrazito lošem stanju – dotrajale, ispucale što samo po sebi da narušava izgled centralnog javnog prostora.

Vijećnik **Piknjač Admir (u ime Kluba vijećnika NiP)** postavio je slijedeća vijećnička pitanja:

16/20. U prethodnom mandatu podnio sam vijećničku inicijativu koja se odnosila na izgradnju dječijeg igrališta u naselju Ugorsko. Na navedenu inicijativu do danas nisam dobio konkretan odgovor, niti su poduzete vidljive aktivnosti po ovom pitanju. S obzirom na značaj i potrebu izgradnje dječijeg igrališta, te kvalitet života djece i roditelja u naselju Ugorsko, molim nadležnu službu da mi dostavi informaciju da li je planirana izgradnja dječijeg igrališta u naselju Ugorsko u tekućoj ili narednoj budžetskoj godini. Ukoliko nije planirana izgradnja dječijeg igrališta u naselju Ugorsko, koji su razlozi.

16/21. Građani naselja Menjak- Balino Brdo, MZ Hotonj, ukupno 8 stambenih jedinica, obratili su mi se kao vijećniku u Općinskom vijeću Vogošća sa upitom prema nadležnoj općinskoj službi kada je planirana izgradnja kanalizacione mreže za navedene objekte. Koji su razlozi što već duži niz godina nije omogućen priključak na kanalizacionu mrežu i koje je aktivnosti Općina poduzela kako bi se riješio problem odvodnje otpadnih voda. Navode da predmetni objekti imaju uredne izdate građevinske dozvole, a već desetljećima nije omogućen priključak na kanalizacionu mrežu, iako su se u više navrata obraćali nadležnoj općinskoj službi.

Dostaviti:

1. Naslovu
2. a/a

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir



Bosna i Hercegovina
Federacija Bosne i Hercegovine
Kanton Sarajevo
OPĆINA VOGOŠĆA
OPĆINSKI NAČELNIK
Stručna služba za poslove
Općinskog vijeća



Vogošća, ul. Jošanička br. 80, tel: 00387 33 586 412, 586-407, fax: 586-407

Broj: 12-04-sl./26
Vogošća, 02.04.2026.godine

**INICIJATIVE POKRENUTE
NA 16. REDOVNOJ SJEDNICI OPĆINSKOG VIJEĆA VOGOŠĆA
održanoj 31.03.2026. godine**

Na 16. redovnoj sjednici Općinskog vijeća vijećnik **Gluhović Alija (u ime Kluba vijećnika Naprijed BiH)** pokrenuo je slijedeću inicijativu:

16/1. U skladu sa povlačenjem tačke dnevnog reda Odluka o komunalnim taksama na području općine Vogošća, pokrećem inicijativu da nadležna općinska služba već za narednu sjednicu Općinskog vijeća pripremi pomenutu Odluku, a u skladu sa odlukama Ustavnog suda i što prije počne naplatu taksu za priređivača igara na sreću i ostalih. Pored toga, apelujem da nadležna općinska služba prilikom formiranja iznosa za pomenute takse uzme u obzir amandmane koje je Klub vijećnika Naprijed BiH predložio na Odluku koja je povučena sa dnevnog reda 16. redovne sjednice Općinskog vijeća, jer su predloženi iznosi minimalni u odnosu na promet koji ostvaruju priređivači igara na sreću.

Vijećnik **Efendić Emir (u ime Kluba vijećnika S BiH)** pokrenuo je slijedeće inicijative:

16/2. Pokrećem inicijativu prema nadležnoj općinskoj službi, da se izvrši uklanjanje grafita sa fasada stambenih zgrada na području općine Vogošća.

Obrazloženje:

Evidentno je da je na području općine Vogošća izražena pojava ispisivanja grafita raznih sadržaja na fasadama stambenih zgrada, što odašilje poruku neurednog i neuređenog prostora za život građana, odnosno životne okoline. Prema naučnim istraživanjima ispisani grafiti izazivaju osjećaj nesigurnosti kod građana, a samo ispisivanje grafita predstavlja kršenje krivičnog zakona. Povodom navedenog, pokrećem inicijativu da Općina zajedno sa etažnim vlasnicima i njihovim predstavnicima izvrši sufinansiranje uklanjanja grafita sa fasada, odnosno izvrši uređenje životne okoline popravkom fasada na kojima su ispisani grafiti. Istraživanja pokazuju da se građani osjećaju nesigurnije u neuređenom i zapuštenom prostoru, odnosno prostoru koji oslikava grubo narušavanje urbanističkog prostora ispisivanjem grafita na fasadama stambenih zgrada.

16/3. Pokrećem inicijativu prema nadležnoj općinskoj službi, za sanaciju i uređenje nivoa postavljenih šahtova i rešetki u ulicama Braće Kršo i Jošanička.

Obrazloženje:

U ulicama Braće Kršo i Jošanička nalazi se veći broj šahtova i rešetki koji su postavljeni na način da se ne nalaze u nivou kolovozne površine. Naime, navedeni šahtovi i rešetke se nalaze iznad ili ispod nivoa kolovoza što značajno utiče na sigurnost saobraćaja i njegovo nesmetano odvijanje. Može se reći i njegovo ugrožavanje zbog toga što su vozači motornih vozila primorani obilaziti navedene šahtove i rešetke kako ne bi oštetili svoje motorno vozilo. Zbog izvođenja navedenih radnji u saobraćaju ugrožavaju se vozači motornih vozila koji dolaze iz suprotnog smjera. Kako bi se poboljšala sigurnost saobraćaja u navedenim ulicama, potrebno je da nadležna služba poduzme konkretne korake koji će dovesti do saniranja i popravke navedenih neujednačenosti na kolovoznim površinama.

Vijećnik **Turković Faruk (u ime Kluba vijećnika SDA)** pokrenuo je slijedeću inicijativu:

16/4. Pokrećem inicijativu da JU Dom zdravlja Kantona Sarajevo izvrši izgradnju invalidske rampe na ulazu u Ambulantu Kobilja Glava, s ciljem omogućavanja nesmetanog pristupa osobama sa invaliditetom, starijim osobama i drugim građanima sa otežanim kretanjem.

Obrazloženje:

Iako visina pločnika ispred ulaza u Ambulantu Kobilja Glava iznosi svega oko 10 cm, takva prepreka predstavlja značajnu otežavajuću okolnost za osobe sa invaliditetom, posebno za korisnike invalidskih kolica, kao i za starije osobe i roditelje s dječijim kolicima. U praksi i minimalne visinske razlike bez adekvatno izvedene rampe onemogućavaju ili u velikoj mjeri otežavaju samostalan pristup zdravstvenim uslugama, što je suprotno principima jednakog pristupa i inkluzije. Izgradnjom jednostavne invalidske rampe riješio bi se ovaj problem na efikasan i finansijski minimalno zahtjevan način, a značajno bi se unaprijedio kvalitet usluga i dostupnost zdravstvene zaštite za sve građane. S obzirom da je riječ o javnoj zdravstvenoj ustanovi, neophodno je osigurati pristupačnost objektu u skladu sa važećim standardima i potrebama svih korisnika. Molim nadležnu ustanovu da razmotri ovu inicijativu i poduzme potrebne korake ka njenoj realizaciji.

Vijećnica **Karović Amra (u ime Kluba vijećnika SDP)** pokrenula je slijedeću inicijativu:

16/5. Pokrećem inicijativu da se postavi svjetlosna signalizacija sa znakom pješačkog prelaza i horizontalna signalizacija na dionici saobraćajnice uključivanja prema Novoj Vogošći.

Obrazloženje:

Na tom pomenutom dijelu dionice saobraćaj se svakako odvija otežano, jer ne postoji svjetlosna signalizacija, semafori, čime je otežano uključivanje na glavni magistralni put iz pravca Rosulja. Kružni tok kod Energopetrol pumpe je uveliko olakšao saobraćaj, međutim uključivanje prema naselju Rosulje, odnosno Nova Vogošća nije adekvatno osvijetljeno, nedostaje pješački prelaz i rasvjetna tijela. Sigurnost građana u saobraćaju i ulaganja u infrastrukturu trebaju i moraju biti prioriteti naše lokalne zajednice. Fotografija u prilogu.

Vijećnica **Salčin Sabiha (u ime Kluba vijećnika SDA)** pokrenula je slijedeću inicijativu:

16/6. Pokrećem inicijativu prema Policijskoj upravi Vogošća, a u vezi pravovremenog djelovanja povećane mjere unaprjeđenja sigurnosti na području općine Vogošća, tj. pojačano patroliranje u rizičnim zonama, prisustvo policijskih službenika u blizini škola i javnih ustanova.

Obrazloženje:

U posljednjem periodu primjetno je povećano nezadovoljstvo građana sigurnosnom situacijom u pojedinim naseljima naše općine. Građani posebno ukazuju na sve učestalije slučajeve narušavanja javnog reda i mira kao što su: provala i krađe u stambenim objektima, obijanje automobila, okupljanje rizičnih grupa u večernjim satima. Zbog toga molimo Policijsku upravu Vogošća da poveća mjere sigurnosti posebno u rizičnim područjima, ukupnog osjećaja sigurnosti građana, preventivno djelovanje, te jačanje saradnje između policije i lokalne zajednice.

Vijećnica **Curić Samira (u ime Kluba vijećnika SDP)** pokrenula je slijedeće inicijative:

16/7. Na osnovu obraćanja građana, pokrećem inicijativu nadležnoj općinskoj službi i resornom ministarstvu da se hitno razmotri i realizuje postavljanje usporivača brzine (ležećih policajaca) u ulici Braće Kršo, na dionici od Srednjoškolskog centra do glavne autobuske stanice. Naime, građani ove ulice su izrazili ozbiljnu zabrinutost zbog učestalog nepropisnog i prekomjernog kretanja vozila, čime se direktno ugrožava sigurnost pješaka, a posebno učenika koji svakodnevno koriste ovu dionicu. Dodatni problem predstavlja povećana frekvencija saobraćaja, naročito u vrijeme dolaska i odlaska učenika, kao i putnika koji koriste autobusku stanicu. S obzirom na navedeno, smatram da je neophodno poduzeti konkretne mjere smirivanja saobraćaja, kao što su postavljanje ležećih policajaca, odgovarajuće vertikalne i horizontalne signalizacije, kao i eventualno dodatno obilježavanje pješačkih prelaza. Realizacijom ove inicijative značajno bi se doprinijelo povećanju sigurnosti svih učesnika u

saobraćaju, a posebno djece i mladih. Molim nadležne da izvrše uvid na terenu i u skladu sa procjenom struke poduzmu potrebne korake u što kraćem roku.

- 16/8.** Pokrećem inicijativu za uvođenje programa „Jedan dan vijećnica“ kao modela osnaživanja žena u lokalnoj zajednici.

Obrazloženje:

U cilju unaprjeđenja položaja žena, djevojaka i djevojčica u našoj općini, predlažem pokretanje programa „Jedan dan vijećnica“, po uzoru na uspješnu praksu iz Općine Centar Sarajevo. U navedenoj Općini organizovan je radni sastanak koji je okupio žene različitih profila, s ciljem otvaranja prostora za dijalog o njihovom položaju u društvu, izazovima s kojima se susreću, te načinima njihovog osnaživanja i aktivnijeg učešća u javnom životu. Ovakav pristup pokazao se kao kvalitetan model uključivanja građanki u procese donošenja odluka i identifikaciju konkretnih potreba zajednice. Ciljevi inicijative:

1. Povećanje učešća žena u javnom i političkom životu
2. Jačanje svijesti o ravnopravnosti spolova
3. Podsticanje aktivizma i društvenog angažmana žena.

Predložene aktivnosti:

1. Organizacija događaja „Jedan dan vijećnica“ najmanje jednom godišnje
2. Uključivanje žena iz različitih sektora (obrazovanje, zdravstvo, biznis, nevladin sektor, mladi)
3. Izrada zaključaka i preporuka koje će se dostaviti Općinskom vijeću
4. Praćenje realizacije predloženih mjera kroz redovne izvještaje.

Očekivani rezultati:

- Veća vidljivost i uključenost žena u procese odlučivanja
- Konkretni prijedlozi za unapređenje lokalnih politika
- Jačanje povjerenja između građana i lokalne vlasti
- Razvoj inkluzivnije i ravnopravnije zajednice.

Uvođenjem ovog programa, naša općina bi slijedila pozitivan primjer dobre prakse iz Općine Centar Sarajevo i napravila značajan korak ka jačanju ravnopravnosti i aktivnog učešća žena u društvu. Stoga predlažem da Općinsko vijeće razmotri ovu inicijativu i zaduži nadležne službe za njenu implementaciju.

Vijećnik **Handić Jasmin (u ime Kluba vijećnika SDA)** pokrenuo je slijedeće inicijative:

- 16/9.** Pokrećem inicijativu prema Vladi Kantona Sarajevo i resornom ministarstvu za izradu Uredbe o upravljanju i održavanju grobalja, te obavljanju pogrebnih djelatnosti kojom bi se prekinula praksa iskopavanja i premještanja posmrtnih ostataka umrlih osoba u slučaju neplaćanja naknade za održavanje i korištenje grobnog mjesta na gradskim grobljima kojim upravlja KJKP Pokop.

Obrazloženje:

Odlukom o uređivanju i održavanju gradskih grobalja definisano je plaćanje naknade za održavanje i korištenje grobnog mjesta. U slučaju da se grobno mjesto ne održava ili ne plaća naknada, grobno mjesto ili grobnica može se prekopati po isteku deset godina od dana dženaze/sahrane. Česti su primjeri da umrli nemaju potomaka, bližih srodnika ili porodice nisu u stanju da plaćaju navedene naknade. Smatram da bi se održavanje grobnih mjesta trebalo urediti na drugi način, a ne prekopavanjem ili premještanjem u zajedničke grobnice.

- 16/10.** Pokrećem inicijativu prema nadležnim službama za hitnu sanaciju i osposobljavanje javne rasvjete na dionici puta od petlje do Semizovca.

Obrazloženje:

Naime, na navedenoj dionici uočena su najmanje dva rasvjetna stuba koja su oštećena u saobraćajnim nezgodama i već duži vremenski period nisu sanirana, kao i nekoliko rasvjetnih tijela koja nisu u funkciji. S obzirom da se radi o magistralnoj cesti, neispravna i oštećena rasvjeta predstavlja ozbiljan sigurnosni rizik za sve učesnike u saobraćaju, posebno u noćnim uslovima i uslovima smanjene vidljivosti. Stoga molim nadležne, da u što kraćem roku poduzmu potrebne mjere kako bi se izvršila sanacija oštećenih stubova i osposobila javna rasvjeta na navedenoj dionici.

Vijećnik **Hebib Armin (u ime Kluba vijećnika SDP)** pokrenuo je slijedeće inicijative:

16/11. Pokrećem inicijativu za uspostavljanje i redovno izdavanje mjesečnog biltena (newslettera) o turizmu Općine Vogošća.

Obrazloženje:

U cilju unapređenja komunikacije, transparentnosti i saradnje između Općine Vogošća i svih relevantnih sudionika u oblasti turizma, smatram neophodnim uspostaviti redovan informativni kanal u formi mjesečnog biltena (newslettera). Bilten bi bio namijenjen predstavnicima lokalnih zajednica, turističkim subjektima, privrednicima, institucijama, nevladinim organizacijama, kao i drugim zainteresovanim stranama i interesnim grupama, s ciljem pravovremenog informisanja o aktivnostima i razvoju turizma na području općine. Predlaže se da bilten sadrži, između ostalog:

- informacije o ostvarenim aktivnostima i napretku u provedbi Akcionog plana razvoja turizma i srodnih djelatnosti u Općini Vogošća za period 2023–2027. godine,
- najave predstojećih projekata i aktivnosti u oblasti turizma,
- primjere dobre prakse i saradnje sa lokalnim dionicima,
- relevantne informacije od značaja za razvoj turističke ponude i promociju općine.

Posebno napominjem da je uspostavljanje i vođenje ovakvog biltena već predviđeno kao aktivnost u okviru Akcionog plana razvoja turizma i srodnih djelatnosti 2023–2027. godine, pri čemu je definisano da se finansiranje osigura iz Budžeta Općine Vogošća u iznosu od 2.000,00 KM na godišnjem nivou. Međutim i pored preuzetih obaveza, navedena aktivnost do danas nije realizovana, zbog čega je potrebno poduzeti konkretne korake ka njenoj implementaciji. Uspostavljanjem ovog biltena omogućilo bi se kontinuirano informisanje, jačanje međusobnih odnosa i izgradnja partnerskog pristupa između Općine i svih relevantnih aktera u oblasti turizma, uz otvorene linije komunikacije i saradnje. Predlažem da nadležna služba Općine Vogošća:

- pokrene aktivnosti na izradi i distribuciji mjesečnog biltena o turizmu,
- uspostavi bazu kontakata svih relevantnih sudionika i zainteresovanih strana,
- definiše sadržaj, dinamiku i način distribucije biltena (elektronski i/ili štampani oblik),
- osigura realizaciju ove aktivnosti u skladu sa Akcionim planom i planiranim budžetskim sredstvima.

Uzimajući u obzir značaj turizma kao razvojnog potencijala općine Vogošća, smatram da je realizacija ove inicijative od posebne važnosti za unapređenje koordinacije, promocije i ukupnog razvoja ove oblasti.

16/12. Pokrećem inicijativu prema Policijskoj upravi Vogošća za uklanjanje neregistrovanih i napuštenih motornih vozila sa javnih parking površina u ulicama Vogošćanskih odreda, Feriza Merzuke i Spasoja Blagovčanina.

Obrazloženje:

Građani više naselja na području općine Vogošća svakodnevno se suočavaju s ozbiljnim problemom nedostatka parking prostora. Povećan broj vozila u saobraćaju, nedostatak novih parking kapaciteta, kao i činjenica da su postojeća parking mjesta često zauzeta neregistrovanim, napuštenim i tehnički neispravnim vozilima, doveli su do otežanog funkcionisanja svakodnevnog života stanovnika. Ovakvo stanje uzrokuje niz problema:

- Smanjuje se broj raspoloživih parking mjesta za vozila koja su u aktivnoj upotrebi, čime se dodatno opterećuju naselja koja se već suočavaju s hroničnim nedostatkom parking prostora.
- Neregistrovana i napuštena vozila narušavaju izgled naselja i negativno utiču na komunalni red.
- Takva vozila mogu predstavljati sigurnosni rizik, kako u pogledu saobraćajne sigurnosti, tako i zbog mogućnosti odlaganja otpada u njih, pa čak i opasnosti od požara.

Napominjem da sam istu inicijativu pokrenuo na 9. redovnoj sjednici Općinskog vijeća prije približno sedam mjeseci. Međutim, do danas navedeni problem nije riješen, te je stanje u pomenutim ulicama i dalje nepromijenjeno. S tim u vezi, ponovo pokrećem ovu inicijativu kako bih skrenuo pažnju na problem koji je i dalje svakodnevno prisutan i koji značajno utiče na kvalitet života naših sugrađana, posebno u segmentu saobraćaja u mirovanju i nedostatka parking prostora, što je dodatno pogoršano prisustvom napuštenih vozila. Pozivam Policijsku upravu Vogošća da u skladu sa važećim zakonskim propisima, hitno poduzme mjere uklanjanja neregistrovanih i napuštenih motornih vozila sa javnih površina. Cilj ove inicijative je:

- Oslobođanje javnih parking mjesta i rasterećenje postojećih kapaciteta,
- Poboljšanje komunalnog reda i sigurnosti u naseljima,

- Stvaranje urednijeg, sigurnijeg i funkcionalnijeg životnog prostora za građane. S obzirom na to da prisustvo ovakvih vozila dodatno usložnjava svakodnevni život stanovnika, smatram da je neophodno hitno i sistemsko rješavanje ovog problema.

Vijećnik **Pašić Edin (u ime Kluba vijećnika SDA)** pokrenuo je slijedeću inicijativu:

16/13. Obzirom na vremenske uslove i činjenicu da se padavine praćene niskim temperaturama najavljuju i u narednom periodu, pokrećem inicijativu prema Vladi Kantona Sarajevo i nadležnom ministarstvu da učine dodatne napore, te obezbijede uredno snadbijevanje toplotnom energijom za sve korisnike usluga BAGS Energotehnika, a sve u skladu sa preuzetim obavezama te odredbama Zakona o komunalnim djelatnostima Kantona Sarajevo i Uredbom o opštim uslovima za proizvodnje, isporuku i korištenje toplotne energije Kantona Sarajevo.

Vijećnik **Omerović Denis (u ime Kluba vijećnika SDP)** pokrenuo je slijedeće inicijative:

16/14. Pokrećem inicijativu prema nadležnim službama za sanaciju oštećenja na putu u naselju Zukića Brdo (Semizovac), nastalih nakon radova KJKP „Vodovod i kanalizacija“ prije više od godinu dana, a koji do danas nisu sanirani.

Obrazloženje:

Naime, usljed radova koje je izvodilo KJKP „Vodovod i kanalizacija“ prije više od godinu dana, došlo je do nastanka većeg broja rupa i oštećenja na putu, koji do danas nisu sanirani niti je kolovoz vraćen u prvobitno stanje. Navedena oštećenja predstavljaju svakodnevni problem za stanovnike naselja, otežavaju normalno odvijanje saobraćaja, te ugrožavaju sigurnost svih učesnika u saobraćaju. S obzirom na protek vremena od izvođenja radova, smatramo da je neophodno da nadležne službe hitno poduzmu aktivnosti na sanaciji i dovođenju puta u adekvatno stanje.

16/15. Pokrećem inicijativu za podjelu kanti za odlaganje komunalnog otpada ili instalaciju kontejnerskih niša u naselju Zukića Brdo (Semizovac).

Obrazloženje:

Građani ovog naselja uredno izmiruju svoje obaveze po osnovu odvoza smeća, međutim nemaju adekvatne uslove za njegovo odlaganje, s obzirom na to da ne postoje kontejneri, niti su domaćinstvima podijeljene kante za smeće. S tim u vezi, molimo nadležne službe da razmotre ovu inicijativu i poduzmu potrebne aktivnosti kako bi se omogućilo uredno i propisno odlaganje otpada u ovom naselju.

Vijećnik **Mehić Almedin (u ime Kluba vijećnika SDA)** pokrenuo je slijedeće inicijative:

16/16. Pokrećem inicijativu prema nadležnom Zavodu za izgradnju Kantona Sarajevo, da se planira ugradnja i postavljanje video nadzora na mjestima gdje se odlaze otpad, konkretno ulica Kenana Brkanića.

Obrazloženje:

Postavljanjem video nadzora znatno bi se smanjilo bacanje nedozvoljenog i otpada opasnog po zdravlje, kao i kabastog otapada. Zemljište koje je u vlasništvu Zavoda za izgradnju Kantona Sarajevo, a nalazi se tačno na dijelu, odnosno granici općina Vogošća i Centar u ulici Kenana Brkanića, svakodnevno je izloženo odlaganju otpada iako su na tim mjestima postavljene upozoravajuće table da se to ne radi. Jedini način da se spriječi, jeste da se postave kamere koje bi počinioce mogle identifikovati i kazniti u skladu sa zakonom koji predviđa te mjere. Vršiti redovno praćene video nadzora i uvesti monitoring uposlenika da stalno obilaze teren i prate situaciju.

16/17. Pokrećem inicijativu prema nadležnim općinskim službama za uređenje parka koji se nalazi ispred sportske dvorane „Amel Bečković“.

Obrazloženje:

Park koji se nalazi ispred sportske dvorane „Amel Bečković“ je ujedno i simbol bola i Trg žrtava Srebrenice, treba da bude ogledalo svih nas. Općina Vogošća je zaista izgradila izuzetno lijep i funkcionalan prostor prije nekoliko godina, koji je ogledalo naše Vogošće. S godinama dolazi vrijeme za rekonstrukciju odnosno „osvježnje“ tog prostora, koji je oštećen odnosno dotrajavao, što radi nemara neodgovornih građana, što zbog vremenskih neprilika. Predlažem inicijativu da se zamjene sijalice na stubovima rasvjete, osvježi i ofarba fontana,

zamjene drvene daske na klupama, postave nove rešetke na odvodima itd. Razumijem da je Budžet ograničen, ali mislim da bi uz ne velika ulaganja vratili sjaj ovog dijela Vogošće, gdje se svakodnevno skuplja veliki broj naših sugrađana svih uzrasta.

Vijećnik **Pašagić Almir (u ime Kluba vijećnika SDP)** pokrenuo je slijedeće inicijative:

16/18. Pokrećem inicijativu za unaprjeđenje funkcionalnosti i sigurnosti objekta Policijska uprava Vogošća. Naime, postojeći objekat raspolaže sa samo jednim ulazom/izlazom, što predstavlja potencijalni sigurnosni i operativni problem. U slučaju hitnih situacija, otežana je brza reakcija službenih vozila, kao i eventualna evakuacija. Također, primjetan je nedostatak adekvatnog parking prostora za građane i službenike, što dodatno otežava pristup i svakodnevno funkcionisanje stanice. S tim u vezi, predlažem sljedeće mjere:

- Izgradnju dodatnog izlaza/ulaza radi povećanja sigurnosti i efikasnosti rada
- Razdvajanje pristupa za službena vozila i građane gdje je to moguće
- Proširenje ili organizaciju dodatnog parking prostora u blizini objekta.

Smatram da bi realizacija ovih prijedloga značajno unaprijedila rad Policijske uprave, povećala sigurnost službenika i građana, te doprinijela boljoj organizaciji saobraćaja u neposrednoj blizini objekta. Molim nadležne institucije da razmotre ovu inicijativu i u skladu s mogućnostima, poduzmu odgovarajuće korake.

16/19. Pokrećem inicijativu za nabavku električnog vozila za patronažnu službu Doma zdravlja Vogošća.

Obrazloženje:

Patronažna služba Dom zdravlja Vogošća obavlja ključnu ulogu u pružanju zdravstvene zaštite građanima na terenu, posebno starijim, hroničnim bolesnicima i nepokretnim osobama. S obzirom na svakodnevnu potrebu za obilaskom velikog broja pacijenata, mobilnost i efikasnost službe su od presudnog značaja. Razlozi za nabavku električnog vozila su:

- Smanjenje troškova - Električna vozila imaju niže troškove goriva i održavanja u odnosu na konvencionalna vozila.
- Zaštita okoliša - Nabavkom električnog vozila doprinosi se smanjenju emisije CO₂ i zagađenja zraka u općini Vogošća.
- Usklađenost sa savremenim standardima - Uvođenje ekološki prihvatljivih rješenja u javni sektor prati evropske trendove i preporuke.
- Povećanje efikasnosti rada - Pouzdano vozilo omogućava pravovremene posjete pacijentima i bolju organizaciju rada patronažne službe.

Ciljevi inicijative:

- Unaprijediti kvalitet zdravstvene usluge na terenu
- Smanjiti operativne troškove Doma zdravlja
- Promovisati ekološku svijest u lokalnoj zajednici
- Dugoročno modernizovati vozni park zdravstvene ustanove

Predloženo rješenje

Nabavka jednog električnog vozila (npr. mali gradski model) koje bi se koristilo isključivo za potrebe patronažne službe.

Poželjne karakteristike:

- Domet: minimalno 250 km
- Niski troškovi održavanja
- Mogućnost institucionalnog punjenja
- Kompaktne dimenzije za gradsku vožnju.

Procjena troškova

- Nabavka vozila: 40.000,00 – 60.000,00 KM
- Instalacija punjača (po potrebi): 2.000,00 – 5.000,00 KM
- Godišnji troškovi održavanja: značajno niži u odnosu na klasična vozila.

Mogući izvori finansiranja

- Budžet Općine Vogošća
- Ministarstvo zdravstva Kantona Sarajevo
- Fondovi za zaštitu okoliša
- EU grantovi i projekti (npr. zeleni fondovi i energetska efikasnost)

- Donacije privatnog sektora.

Zaključak

Nabavka električnog vozila za patronažnu službu predstavlja dugoročno isplativo i društveno odgovorno ulaganje koje će unaprijediti kvalitet zdravstvene zaštite i doprinijeti zaštiti okoliša. Polivalentna patronažna djelatnost u Domu zdravlja Vogošća, koju trenutno čine 3 diplomirane medicinske sestre i 1 medicinska sestra-tehničar, prosječno ima oko 15 kućnih posjeta i dnevno prelazi do 100 kilometara. U proteklih 12 mjeseci u 2025. godini ostvarila je 5.615 posjeta i pružila 7.932 usluge.

Vijećnica **Čomaga Almedina (u ime Kluba vijećnika NiP)** pokrenula je slijedeće inicijativu:

- 16/20.** Pokrećem inicijativu prema nadležnoj službi za rekonstrukciju igrališta u ulici Spasoja Blagovčanina.

Obrazloženje

Igralište se lokacijski nalazi između dvije ulice, Spasoje Blagovčanina i Feriza Merzuka ali i u blizini ulice Vogoščanskih odreda i samim tim ga koriste mnogobrojna djeca kako tih, tako i ostalih vogoščanskih ulica i naselja. Potreba za njegovim obnavljanjem dolazi iz više faktora vremenskih, ljudskih i sl. Igralište je u upotrebi svakodnevno u svom punom kapacitetu, gdje naša djeca uživaju svakodnevno provodeći svoje slobodno vrijeme upravo tu. Obnavljanjem njegovog mobilijara poboljšala bi se funkcionalnost samog igrališta ali bi se uljepšao i ambijent samog naselja.

Vijećnik **Gljiva Bego (u ime Kluba vijećnika S BiH)** pokrenuo je slijedeće inicijative:

- 16/21.** Pokrećem inicijativu prema JU KSC Vogošća za pokretanje programa besplatnog, kontinuiranog terapijskog plivanja za djecu sa poteškoćama u razvoju na području općine Vogošća.

Obrazloženje:

Na području općine Vogošća živi značajan broj djece sa poteškoćama u razvoju koja nemaju adekvatan pristup kontinuiranim terapijama u svojoj lokalnoj zajednici. Plivanje je jedna od najefikasnijih terapijskih metoda koja:

- poboljšava motoričke sposobnosti i koordinaciju
- pozitivno utiče na psihofizičko stanje djece
- smanjuje stres i anksioznost
- daje značajne rezultate kod djece sa različitim razvojnim poteškoćama

Uprkos postojanju bazenske infrastrukture na području općine, ovakav program trenutno nije organizovan i dostupan. Roditelji su primorani da svoju djecu vode u druge općine, što predstavlja dodatno finansijsko i logističko opterećenje, te stvara osjećaj nejednakosti među građanima. Važno je naglasiti da su pojedine općine u Kantonu Sarajevo već uspješno implementirale slične programe, koji su se pokazali kao izuzetno korisni i potrebni. Prijedlog realizacije, predlaže se da JU KSC Vogošća u čijoj je nadležnosti bazen Vogošća da organizuje redovne termine (2–3 puta sedmično) za terapijsko plivanje, ako je potrebno da se angažuje stručni kadar treneri plivanja ukoliko već ne postoji, ostvari saradnju sa Centrom za socijalni rad i relevantnim udruženjima, objavi poziv za prijavu korisnika programa, eventualno izradi dodatnu procjenu troškova ovoga programa, izradi plan implementacije programa, pokrene pilot projekat u roku od 3 mjeseca. Cilj ovakve inicijative je unapređenje kvaliteta života djece sa poteškoćama u razvoju i podrška porodicama, jačanje inkluzije i jednakih mogućnosti i afirmacija društveno odgovorne uloge Općine

- 16/22.** Pokrećem inicijativu prema Ministarstvu unutrašnjih poslova, Policijska uprava Vogošća. Predmet inicijative: Postavljanje ili unaprjeđenje postojeće saobraćajne signalizacije kojom se vozači pravovremeno upozoravaju na prisustvo stacionarnog radara za kontrolu brzine na ulazu u naselje Semizovac.

Obrazloženje:

U naselju Semizovac instaliran je stacionarni radar s ciljem povećanja sigurnosti saobraćaja, posebno u blizini naseljenog područja i zone kretanja djece. Međutim, na terenu nije jasno uočljiva ili adekvatno istaknuta signalizacija koja bi vozače pravovremeno upozorila na kontrolu brzine. Upozoravajuća signalizacija ima ključnu preventivnu ulogu jer:

- podstiče vozače na smanjenje brzine
- doprinosi sigurnosti pješaka i djece
- smanjuje rizik od saobraćajnih nezgoda.

Važno je naglasiti da svrha radarskih sistema treba biti prvenstveno preventivna, a ne represivna. Ukoliko signalizacija na navedenoj lokaciji već postoji, potrebno je izvršiti njenu procjenu u pogledu vidljivosti, pozicioniranja i usklađenosti sa propisima, te izvršiti eventualno unapređenje. Prijedlog realizacije:

Predlažem da nadležno Ministarstvom unutrašnjih poslova Kantona Sarajevo i upraviteljem cesta izvrši uvid na terenu i procjenu postojećeg stanja, postavi ili unaprijedi vertikalnu signalizaciju (tabla upozorenja na radar), po potrebi dopuni horizontalnu signalizaciju (oznaka na kolovozu) i osigura da signalizacija bude jasno vidljiva i postavljena na propisanoj udaljenosti. Cilj inicijative:

- povećanje sigurnosti svih učesnika u saobraćaju
- preventivno djelovanje na vozače
- smanjenje prekoračenja brzine
- zaštita lokalnog stanovništva, posebno djece.

Vijećnik **Piknjač Admir (u ime Kluba vijećnika NiP)** pokrenuo je slijedeće inicijative:

16/23. Pokrećem inicijativu prema nadležnoj općinskoj službi, nadležnim institucijama i preduzećima kojom tražim pokretanje aktivnosti za identifikaciju i zamjenu dotrajalih, izbljeditih i oštećenih saobraćajnih znakova, te postavljanje adekvatne saobraćajne signalizacije na pružnom prelazu prema naselju Svrake na području općine Vogošća. Naime, značajan broj saobraćajnih znakova na pojedinim lokacijama je u takvom stanju da nije dovoljno vidljiv niti čitljiv učesnicima u saobraćaju, posebno u uslovima smanjene vidljivosti (noć, kiša, magla, itd.). Ovakvo stanje direktno utiče na sigurnost svih učesnika u saobraćaju, a pogotovo na nemile događaje poput saobraćajnih nezgoda koje ugrožavaju ljudske živote. Predmetni pružni prelaz već duži niz godina predstavlja izrazito rizičnu tačku u saobraćaju. Na istom mjestu su se u proteklom periodu dešavale brojne saobraćajne nezgode, uključujući i one sa smrtnim ishodom. Posebno zabrinjava činjenica da je prije izvjesnog vremena na ovoj lokaciji došlo do teže saobraćajne nesreće u kojoj je jedno lice zadobilo teške tjelesne povrede. Uzrok ovakvih nezgoda je nedostatak adekvatni saobraćajnih znakova kako bi se sigurno i pravovremeno ukazalo na nailazak na pružni prelaz, te povećao nivo opreza i sigurnosti. S tim u vezi, predlažem nadležnim organima da postave odgovarajuću vertikalnu i horizontalnu saobraćajnu signalizaciju, razmotre ugradnju dodatne svjetlosno- zvučne signalizacije (rampe, polubranici, signalna svjetla), te po potrebi izvrše i druge tehničke zahvate koji bi doprinijeli povećanju sigurnosti. Također, na lokaciji kod automatske praonice na raskrsnici prema naselju Ugorsko, ulica Igmanska, saobraćajna traka koja je predviđena i namjena je da se istom kreću autobusi i trolejbus, a ujedno je i autobusko stajalište označena je znakom "zabrana saobraćaja u oba smjera, osim vozila gradskog prevoza". Znak je išaran i ne služi svojoj namjeni, a često vozači pomenutom saobraćajnom trakom zaobilaze kolone vozila, a ne vide postavljeni znak i budu sankcionisani zato što saobraćajni znak nije uopšte uočljiv.

16/24. Pokrećem inicijativu za promjenu naziva autobusnog stajališta koje trenutno nosi naziv "Jošanica", a koje se nalazi u ulici Igmanska kod raskrsnice za naselje Ugorsko u općini Vogošća.

Obrazloženje:

Postojeći naziv autobusnog stajališta "Jošanica" ne odražava stvarnu lokaciju u blizini naselja Ugorsko, što dovodi do zabune putnika. Promjena naziva doprinosi jasnijoj identifikaciji mjesta i praktičnijem korištenju javnog prevoza. Molim nadležnu općinsku službu da uputi zahtjev nadležnim institucijama da izvrše izmjenu naziva autobusnog stajališta sa "Jošanica" na Ugorsko, te da postave odgovarajuću obavjesnu tablu sa novim nazivom.

RUKOVODILAC
STRUČNE SLUŽBE ZA POSLOVE
OPĆINSKOG VIJEĆA

Crvenjak Elvir